



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail: tiryimiyim@gmail.com

TAPAK 10

Yangia anidakangma :

Tir Yimiyim

tiryimiyim@aolima

tiryimiyim

TAPAK 3

Wicket timtiba agitsü mangdang lir: Mohammed Siraj

Manipur CM N Biren Singh-i Churachandpur Medical College asadang

VOL. XVIII NO. 174 (ADOK 174) DIMAPUR

ROGONÜ (FRIDAY)

RONGCHII (APRIL) 09, 2021

₹ 5.00

COVID-19 Nagaland: Cases tasen pongu liasü

Kohima, Rongchii/April 08 (TYO): Nagaland nung nisung tasen pongu dak COVID-19 puteta Brestobarnü tashinung iba tashidak agi state nung nisung 12,381 menepogo, ta heath ketdangsur kati ashi.

"Tanü Dimapur nung COVID-19 positive nisung pongu dak putet," ta Minister, Health & Family Welfare, S Pangnyu Phom-ia Twitter nung metetdaksü.

Item caseload nungya taneptsü angur nisung 11,984 aser active patient 147 dena lir, ta pai ashi.

Taneptsü anguba shilem Bodhbarnü 96.81 aliba nungi 96.79 kumogo, ta Director, Health Department, Dr Denis Hangsing-i anogoshi COVID-19 osang metetdaksüba nung ashi.

Tang tashinung danga tashidak keta alir nisung ter densema nisung 91 iba tashidak agi süogo aser shiranger nisung 159 danga state temi ogo, ta pai ashi.

Dimapur nung active cases pezü dak iba tashidak agi timtem terara agütsüba lir aser Kohima nung COVID-19 positive nisung 127, Dimapur nung 14 aser Tuensang nung ana dak iba tashidak agi timtem

agütsübabo mali, ta pai ashi.

Nagaland nung tang tashinung COVID-19 tashidak alitsü temolung melemteti nisung 1,37,712 dak tendangogo aser item ya RT-PCR ajanga 75,640, TrueNat ajanga 37,578 aser Rapid Antigen Test ajanga 24,494 tendanga lir, ta Dr Hangsing-i ashi.

Kasa mapan Nagaland nung nisung 75,331 nem Covishield mozü doses 1,02,451 agütsüogo, ta State Immunization Officer Dr Ritu Thurr-i metetdaksü.

State nung COVID-19 mozü agir alir ya frontline worker 38,654, healthcare professional 12,384, teintet rogo 15,613 aser arishi küm 45 dak tema danga tashidak keta alir nisung 8,680 alitsü, ta pai ashi.

Item rongnung frontline worker 17,658, healthcare worker 8,616, teintet rogo 562 aser arishi küm 45 tema danga tashidak keta alir 284 nem COVID-19 mozü dose tanabuba agüja parnok vaccination course tembangogo, ta paisa ashi.

Iba mozü agir alirtem rongnung nisung kata mozü kidangi anir oa alepalutsüsa timtem ajurua mali, ta Dr Thurr-isa metetdaksü.

Sorkari telanzüba tajung magütsüra NIDA-i longkak tesashiba aittsü

Dimapur, April 08 (TYO): WHO-i Doctor Population ratio ji 1:1000 asütsü lateta lir, ajisiaka National average 1:1445 (Economic Survey 2019-20) den medemdantra state nungbo 1:4056 lir (Projected Population 2020); yamaji linük nung doctor lakh 10 shi nüngdaker, saka küm shia doctor 70,000 shi dang adoker, ta NIDA Core Committee on Superannuation Convenor, Dr. Thorhusie Katiry aser Nagaland-Inservices Doctors Association Tir, Dr. E. Phyantsuthung nati sangdong ka ajanga metetdaksü.

"WHO telatetba apibo state nung doctor 2,073 shi nüngdaker, saka Nagaland Medical Council kübok register asüba doctor 1118 dang lir, anungji state nung doctor 955-i madoksa. Tang küm shia state nem MBBS menden 35-40 dang lemzütsür, anungji WHO telatetba atongtsü atema küm 23 nungi küm 27 tashi agitsü," ta NIDA sangdong nung shia lir.

"State nung health system tajungba akümsü atema sorkari inyakba asoshi Association-i pelar. 2020 küm Covid wara mapang nung doctor post 120 adokdaksüba sülen doctor post ajak agi 511 jungogo, ajisiaka health facilities nung IPHS (Indian Public Health Standard) apibo doctor 800 shii mabensa. Iba dak alia tarutsü nung medical college ana atema doctor 300 nüngdaksü. 2020 küm post tasen atema shimtsü asoshi advertisement agütsüba sülen post tazüng 199 atema candidate 168-i dang tenüng agüja liasü. Ibaji ajanga state nung doctor agi kanga anüngba kuli sayur. Anungji doctor tem 'superannuation' küm timba kümtsüba agi state nung mapa manguba doctor tem mekongshitsü," ta sangdong nung shia lir.

"2016 küm Central srokari doctor agi anüngba teblemtsü bentettsü atema medical college aika

amenoktsü lemteta liasü aser iba nungji Nagaland nunga Medical college ana densema lir. Iba dak alia doctor tem superannuation küm 62 nungi 65 tashi kümtsütsü lemtet," ta sangdong nung shia lir.

"State nung doctor agi anüngba nung ajemdaker 2016 küm nungi NIDA-i Central sorkar policy den sendaktepa doctor tem superannuation küm timba kümtsütsü atema akhanger, ajisiaka state sorkari iba atemaji meinyaker. Iba onük ya nija tajungzuk atema masü saka state nung healthcare jenjang tajungba akümsü atema lir," ta sangdong nung shia lir.

"Sorkari telanzüba magütsüba nung ajemdaker 2021 küm January 25 nü mezüng NIDA-i longkak aita liasü aser March 30 nüa osangbenertem senden nung NIDA-i sorkari iba onük atema meinyakra longkak tesashiba aittsü ta metetdaksüogo," ta sangdong nung shia lir.

"State Cabinet-i doctor tem superannuation atema jembitsü asoshi mapang atsülanga arur. Linük nung Medical College maliba state ji Nagaland kija lir. State sorkari iba atemaji inyaknura asalentong yanglutsüla. Iba atemaji meinyakra tarutsü nung doctor tem nem tai metongloktsütsüla," ta parnoki metetdaksü.

"Item kulitem nung ajemdaker Union Cabinet teletetba agizüksü atema sorkari teletetba magira NIDA-i longkak tesashiba aittsü. Longkak aitha tanabuba shilem nung Association züngsem ajaki April 12 nungi April 14, 2021 tashi casual leave agitsü (iba mapang nung emergency services dang angutsü) aser tasembuba shilem nung- April 15 nungi state tesem ajaklen Emergency Service dak alaka anogo telatet makai mapa meinyaksü," ta kasa sangdong ajanga metetdaksüogo.

Y. Patton & Cabinet sub committee-i Lamhai Namdi tesem semdang



Nagaland Deputy CM Y. Patton, Cabinet Sub Committee züngsemtem, principal secretary Home, Commissioner Nagaland nungeri April 8 nü, Dimapur aser Peren arrtsü nung March 22 nü lendong atalokba tesem semdangba mapang tangokba noksa nung angur.

Dimapur, Rongchii/April 8 (TYO): Nagaland Deputy Chief Minister aser Home and R&B incharge, Yanthungo Patton-i April 8 nü LAMHAI NAMDI temeket nung aliba tesemtem semdanga Dimapur-Peren arrtsü nung tensa asadangogo.

Dimapur aser Peren district arrtsü bentettsü atema tentettsüba Cabinet Sub Committee, kong Ministers Neiba Kronu, Paiwang Konyak, Pangyu Phom aser Kashiho Sangtam densema lir parnoki meiner March 22 nü lendong atalokba tesem aser lendong nung asür nisung asem aremba

tesem semdanga liasü.

Iba sülen 9th IR Battalion HQ Saijang nung senden tatsüka amen. Senden nung Patton-i, temzüng ozüng shidak benoka yimjung aser tesunep nung iba tesem temeket toktsütsü, aser talisa mangatetep adoker aliba tesemtem nung lendong atalok nisung taküm samba aser kiojen raksaba nungi jenboa alitsü atema inyaksü mepeshia metetdaksü.

Paisa, sorkari status quo dak sendakba nung tetuyuba agütsür aliba ajang ajanga benoktsü mepeshi. Patton-i ashiba agi, ali nung mangatetep adokba ajanga nisung taküm samaba sorkari

süoki ia agir aser iba atema Special Investigation Team ka March 23 nü tentettsüogo. SIT yagi tang tashi nung nisung 4 puogo aser ken o maneni bushitsüngdangdar, ta pai ashi. Maneni minister-isa, SIT report agütsüba sülen aibelena alirtem temzüng ozüng dak ajemdaker merenshitsu, ta ashi.

Principal Secretary Home, Commissioner Nagaland, ADGP (L & O) IGP (INT), Dimapur aser Peren Deputy Commissioners, Commissioner Police Dimapur, Dimapur aser Peren SP, aser tanga ketdangsurtemi tesemdangertem meina liasü.

COVID-19, Kohima District Task Force senden menogo

Dimapur, Rongchii/April 8 (TYO): April 7 nü DPDB Conference Hall nung senden amenba mapang Covid-19 tashidak menar tali küma aoba ken o dak sendakba nung COVID-19, Kohima District Task Force-i onük aika benoka sensaksemogo.

Iba senden nung COVID-19 dak sendakba nung Kohima district Minister-in-charge, Minister for PWD Housing & Mechanical, Tongpang Ozukum aden aser Deputy Commissioner Kohima Gregory Thejawelie, NCS lenisüba kübok agia liasü.

Covid-19 tashidak tali prokshia aoba aser iba ken o dak sendakba nung district renemshiba indang sensaksemba mapang, pei tata tesem nung Covid-19 dak sendakba maparen takaratiba nung benoka inyaksü atema sector officer aser wards/colonies COVID-19 teloktem tanaben tenzüksütsü teletetba agi. Senden nungsa, tashidak

menar tali akümba ajanga aser tanga state nungi arurtem pei tata tesem nung asadangtsü nüngdakba ajanga iba inyakyim ya kanga tongtibang akümba lemsatep.

Iba dak sendakba nung Ozüküm-i, district kübok ward, colony aser Panchayat temi shilem magi asübo takok monguteti lia ta ashiba den, ken o dak sendaka aliba kija, lokti ajak dang tang benoka aliba SOP tem takok nung benoktsü atema maneni nongita yaritsü ayongzüik.

Ward aser colony ajak nung tang agüja aliba Standard Operating Procedures (SOPs) tem takok ngua benoktsü atema, High Power Committee on COVID-19 dangi All Kohima Municipal Ward Panchayats (AKMWP) bendangtsü teletetba agi. Iba telok yagi pei tata tesem nung SOP aser talisa mask asemba ajang ajanga benoktsü aser aibelenertem nem temerenshi agütsütsü.

Iba dak sendakba nung DC-i, DTF kübok District Administration, Police aser Medical team-i April 5 nü Kohima jila nung COVID-19 inyakyim benoktsü atema ajungbena meita ao aser aibelenertem nem temerenshi agütsüogo, ta ashi. Paisa, ajak ajangzüksü atema DTF-i tarutsü nunga iba amala sentong benoka inyaksü, ta ashi.

State Health Department-i nongloktsüba ama DTF-isa, union aser AKMWP organization tem den longjemer Kohima jila telongtet nung nisung mashi kar dak tashidak sample bendena tendangtsü teletetba agi.

Kasa mapang nung Chief Medical Officer Kohima, Dr. Vezokholu Theyo-i tawa St. Paul Training Institute nung tashidak keta alir potetba indang metetdaksü aser ashiba agi, tenüngdakba jenjang ajak agiogo aser tashidak potetertem den ajuruteper alirtem anepaluogo.

BDO tem Performance Review senden nung Neposo-i shilem agi

Kohima, Rongchii/April 8 (TYO): Commissioner and Secretary RD, Neposo Theluo, IAS-i tanü, BDO temi RGSA kübok inyakyimtem ajungkettsü atema inyaksüla aser 15th Finance Commission inyakyim nung temulung agütsütsüla ta ashi.

RD Conference Hall nung tanü Block Development Officers, Performance Review senden nung o jembiba mapang pai, BDO tem dang 15th FC atema account

lapokba inyakyim takaratiba nung inyaksü mepeshi, ajita asünungdang temerenshi angutsü aliba nungi jenbotsü aser iba sentong benoka inyak tenzüksü mapang material tem tajungtiba agütsütsü, ta ashi.

Paisa, BDO temi field tem semdangtsüla aser inyakyim benoka inyakba mapang yimdaklirtem nem teyari agütsütsü aser len sayutsü atema PHE department den teka amteper

inyaksüla, ta ashi.

Senden nung Joint Director, RD, K. Neibou Sekhose-i lokti pelaa agizük aser ketdangsur ka asüba khuret aser yimyatem indang lemsatep. Paisa, taoba financial year nung takoktem indang lemsatep, kong pai Chiechama, Okotso aser Kezoma yimtsüngtemi jenjang balala nung tetushi agüzükba indang metetdaksü.

(Maneni tapak 2 nung ...)

Noklak nung Shingjung Road lapokogo

Dimapur, Rongchii/April 08 (TYO): 56 A/C Noklak indang BJP Mandal president, M. Pushen ajanga April 8, 2021 nü KBCA Komking nungi Nokhu main road tashi, Shingjung Road lapoktsüba sentong ka KBCA Junction, High School 'B' Noklak nung agia liasü.

Iba sentong nung lenmang yangluba osang tongmelang ka Yamtsumong-i agütsü. Iba lenmang ya temolunger tenla agi yangluba lir, koba High School B Sector ajanga animesor tenzük, ta pai ashi. Kilometer ana dang talangba lenmang ya Nokhu, Peshu aser Pathso range amala

sendakteptsü asoshi lenmang tatsütiba aser ano danga lenmangtema sendakteptsür. Iba lenmang meshiteta Pastor Thengio, Komking Baptist Church ajanga sarasadem, aser iba sentong nung Chairman, High School 'B' Sector, Noklak Sangyang menden liasü.

Nagaland Board of School Education ajanga metetdaksür

Dimapur, Rongchii/April 08 (TYO): Nagaland Board of School Education ajanga sangdong ka nung Para-Medical/Agri aser Allied degree Courses pur atema Nagaland State Entrance Examination (NSEE) 2021 agitsü, ta metetdaksü.

ya tang NBSE ajanga Classes XI & XII (Common Core syllabus) Science stream atema amshiba syllabus dang alitsü, ta sangdong ajanga ashi.

- 45 items (ii) Chemistry - 45 items (iii) Botany - 45 items (iv) Zoology - 45 items.

Nagaland State Entrance Examination ya May 20, 2021 nü agitsü sentong lir.

NSEE 2021 indang tasüngdangba ajak Multiple Choice Questions (MCQ) kisüng alitsü.

NSEE 2021 atema Admit Cards ya Office of the Nagaland Board of School Education, Kohima nungi agütsütsü aser danga osangtem tarutsü anogotem nung osang kaket balala ajanga sangdongtsü, ta NBSE ajangasa metetdaksü.

Kohima aser Jaluki nung mi lendong atalok

Dimapur, Rongchii/April 8 (TYO): April 5 nü anepdang 6:31 ako nung Lerie Colony, kübok St. Mary Higher Secondary School, Kohima anasa mi adokba osang ka angazükba sülen Fire Station Kohima (South) nungi Fire & Emergency Services team mi temseptsü atema ao.

mapang shidak nung jenjang tapet agiba ajanga lendong tulu nungi jenbogo. Fire response team ya Duty Commander SI Keyirangsobe aser ASI Wangkin lenisüba nung inyaksangshia liasü.

team ka mi temseptsü atema ao. Iba lendong nung Katcha ki ka aser ki osettem aika rongtokogo. Osettsüt sen lakh 4.5 alang mi agi rongtokogo. Mi ya sorchiokba tesem nung adok asütsü ta temulung melembilemer. Ajisüaka mapang shidak nung osang agütsüba aser Fire response team-i jenjang tapet agiba ajanga ki oset sen lakh 10 shi alang kümzüktetogo. Fire response team ya Duty Commander ASI Neikielie Keyiencu-i anir ao.

Fire Tender ana den Hadir teperi bener Fire Personnels tem mi temsepi ao. Mi ya LPG cylinder leak asüba ajanga adokba liasü. Fire personnel temi

Kasa mapang nung April 6 nü Jalukie kübok Heningkunlwa yimtsüng nunga ki ka rongtokogo. Anüngdang 12:48 shi nung mi adokba osang angazükba sülen Fire Station Jalukie nungi hadir teperi bener Fire & Emergency Services

NSCN/GPRN (R)-i asükhu lemsatep

Dimapur, Rongchii/April 8 (TYO): April 7 nü asür Rev. Mankup Konyak asüba osang angazüka NSCN/GPRN (R) tir Inno Y. Wangtin Naga aser züngsemtem ajak mang ayimba MIP sangdong ka ajanga metetdaksüogo.

dangi anir aruogo aser mangku bushirtem aika dang len sayua Khristan kümdaksüogo, ta kasa sangdong ajanga lemsatep.

Naga nunger aser talisa Konyak nungertem atema takoksa tulu lir. Ajisüaka pai toktsür aoba mapa tajungtem ya tarutsü putui anidaksü atema tsüngsü tajung asütsü.

Asür Mankup ya tasütait Khrista sepai ka liasü, shibai India aser Myanmar arrtsü nung osang tajung prokshitsü atema anibelem mesasai inyakogo. Pai samaa aliba santem aika Khrista

Tir Wangtin-i, asür Mankup ya pei agitsü mebilemi bendanga agüja inyakba tamangba yimsü lenir ka liasü aser pa tenüng nung kena aika mejemja India aser Myanmar arrtsü len kinük nung aliba tesem aika nung tenogo, ta ashi

Tajungsang Tsüngremi pa tanüla tesunep nung anisüngzükdakjang aser mangyim jashi tia nung aliba mapang par kinunger aser tembartem nem anisüngzükdakjang ta sarasademtsü, ta kasa sangdong ajanga lemsatep.

BDO tem Performance Review senden... (TAPAK 1 NUNGI...)

Department-i benoka inyakba sentong aser scheme tem indang jembiba mapang Joint Director-i, 15th Finance Commission telemsa aser Tied aser Untied Funds tebandang indang metetdaksü. Scheme balala indang bank accounts anepaluba indang jembidang pai, programme/Scheme balala atema bank accounts balala

lapoka ayutsü kanga tongtibang, ajita asünungdang senotsü tetsükdaksü makai tsütateptetsü, aser schemes ka kübok mapatem takok ngua benoka inyaktetsü, ta ashi.

züngoksemtsü aser Geo-Tagging inyakyim takaratiba nung benoka inyaksü mepeshi.

PMAY-G kübok Hamdok M. Konyak, RDO-i, Block tem inyakyim aser jenjang indang osang agütsü aser parnok dang senotsü agütsür aliba mapatem

Senden nung BDO temi tetsükdaksü ajangshibatem indang benoka sensak asem aser item tetsükdaksüitem bentetsü atema lemsatepa liasü. Iba senden ya mendenbubai tepela anküp o jembir tembang.



Director, Industries & Commerce, K Hokishe Assumi ajanga Brehostibarnü Urban Haat, Dimapur nung special handloom Expo "Hornbill" NERTPS lapoktsüba mapang tangokba noksa nung angur. Iba Expo ya Ministry of Textiles, Government of India ajanga Development Commissioner, Handlooms kübok sponsor asüba lir. Anogo 14 agitsü aliba expo nungya Assam, Manipur aser Nagaland nungi shilem agir.



Speaker, Nagaland Legislative Assembly, Sharingain Longkumer-i ketdangsüa Assembly Secretariat, Kohima nung pa indang Office Chamber nung 51 Noksen (ST) Assembly Constituency nungi tang tasen shimtetba züngsem, H. Chuba Chang nem April 8, 2021 nü tenangzüktep agitdaksüba mapang tangokba noksa ka yangi angur.

NITI Aayog ajanga metongshitsür

Dimapur, Rongchii/April 08 (TYO): CEO aser Director, NITI Aayog ajanga Kiphire semdangba indang osang ka April 7, 2021 nü osangkaket nung adokba nung CEO ajanga ashiba agi, Kiphire District nung doctors, nurses, science aser mathematics tesayurtem shidak yokba sülen ang sen sanction agütsütsü, ta metongshitsür.

January 2021 mapang inyaksangshi aser Delta ranking nung takok anguba nung ajemdaker Kiphire Aspirational District nem NITI Aayog ajanga sen talila crore 5 lemzüksü. District dang sector/theme balala aliba proposal tem benoktsü asoshi totuyuba agütsüogo, ta sangdong ka ajanga ashi.

Assam Rifles-i teyari agütsü



Kohima, Rongchii/April 8 (TYO): Spear Corps kübok Assam Rifles, Mokochung Battalion-i, Longleng district kübok Yongja yimtsüng nung mi lendong agi kongshir aliba kibongtem nem teyari agütsü. Yongja yimtsüng nung April 6 aser 7 aonung mi lendong ataloka liasü. Iba mi lendong nung ki ana rongtok kong kibong ka nungi nisung tenet lia liasü.

ao aser lendong ataloker aliba tesem nungi ki oset aser nisungtem anina liasü. Lendong nung nisung asem kanga mejungi yiru aser parnok asem nem medical team kati teyari agüja liasü. Kasa mapang nung takoksa ajurur alirtem nem tenüngdakba osettsüt agütsüogo.

Mi lendong atalokba osang angazükba sülen security forces tem iba tesemi aritepa

Security forces temi jenjang tapet agiba atema District Administration-i parnok dang kanga pelaba lemsatepogo, ta PRO (Def) Kohima, Lt Col Sumit K Sharma-i sangdong ka ajanga metetdaksü.

Security Forces-i NSCN (R) züngsem ka apu



temeket meita aoba mapang Security Forces aser Police na senteper NSCN (R) züngsem ka puogo.

Dimapur, Rongchii/April 8 (TYO): April 5 nü Arunachal Pradesh, Changlang District kübok Kangkho tesem

Osang tejangja angazükba sülen State Police den longjemer Security Force temi Changlang District kübok Kangkho tesem anasa NSCN (R) züngsem ka pua liasü. Parnoki apusang ya Changlang Police Station nem bendanga agütsüogo aser ken o maneni bushitsüngdangtsü.

Manipur CMNBiren Singh-i Churachandpur Medical College asadang



Imphal, Rongchii/April 8 (Agencies): Manipur chief minister N Biren Singh-i Brehostibarnü Churachandpur Medical College achaayangba aser kisü-jensü asadangogo. Taoba küm December ita Manipur semdangba mapang Union home minister Amit Shah-i medical college tasenba atema nüngshilong azüingja liasü. Churachandpur Medical College, ya tang Chaurachandrapur nung amenoker aliba district hospital ajungketa yangludat. Iba mozüki ya ali acre 25 nung yanglutsü aser shirangertem temang tajungtiba anepalutetsü atema latest health facilities inoka yaglutsü. Iba medical college nung MBBS kaketshirtem atema menden 100 agütsütsü. Centre-i iba medical college tasenba yanglutsü atema sen crore 325 sanction süadokogo. State nung tanga medical college ana ya Imphal West district kübok Lamphelpat nung amenoker aliba Regional Institute of Medical Sciences (RIMS) aser Imphal yimti nung amenoker aliba Jawaharlal Nehru Institute of Medical Sciences (JNIMS) lir. Maneni Manipur sorkari Thoubal aser Chandel district nung ano medical college ana amenoktsü atema centre dangi benogo. Thoubal nung medical college ya tang amenoka aliba district hospital ajungketshia yanglutsü. "Churachandpur Medical College construction & functional management dak sendakba nung lepareprangshiba senden ka ayongzüka menogo, koba state nung medical college tasembuba asütsü. Medical college tasenba amenoktsü atema @MoHFW_INDIA-i sen crore 325 agütsüogo," ta N Biren Singh-i tweet asü.

Assam: Congress-i postal ballot mezüing azüingtsü asüingdang

Guwahati, Rongchii/April 8 (Agencies): Assam Assembly election tembangba sülen anogo ka lir Congress-i Election Commissioner of India (ECI) dang postal ballots mezüing azüingtsü asüingdangogo. Assam Pradesh Congress Committee (APCC) tir Ripun Bora-i shiti ka ajanga Bodhbarnü poll panel dang EVM vote tem mazüing tsüingda postal ballot vote tem mezüing azüingtsü mepeshia mazüing tsüingda postal ballot vote azüingtsü atema jenjang tapet agitsü nü dang mepeshir, ajita asüingdang Assam nung Assam Assembly Election nung vote azüingba nung tashishiba kecha malitsü aser shingaiia Election Commission dak tai metongloksütsü," ta Bora-i ashi. Voter 2, 33, 74,087 nungi shilem 83 dak temai Assam assembly nung vote agütsüogo. Election agiba result May 2 nü sangdongtsü. "Taoba Bihar Assembly Election nung EMV vote tem azüingba sülen anonung tesüang postal ballot vote tem azüing. Iba ajanga ballot azüingba mapang candidate tem aikati ken o aika ashishiba den mangatettep aika adok aser iba ya social media nung prokshia ao. Ibayongji candidate tem aika vote ishishi agi election nung tamakok angu aser Election Commission dak tai tongloksü tenzük," ta shiti nung shia lir. "Anungji onoki EVM vote

Covid-19: Tripura nung standard I & II class anena atar

Agartala, Rongchii/April 8 (Agencies): Tripura education department-i Brehostibarnü, class I aser II nung azüingertem class mapang telatet ka makai shibanga atatsü telemtetba agiogo. State education minister Ratan Lal Nath-i, class agi anena ataba osang metetdakja liasü. Paisa, standard III aser IV nung azüinger kaketshirtem class hopta nung asembenben agia atatsü, ta metetdaktsü. Minister-i ashiba agi, state nung tawa Covid-19 tashidak keta alir tali potetyonga aoba apir iba telemtetba agia liasü. Ajisüaka class tulupurtem, hostel aser college tem taoba mapang ama dang inyaksangshia atatsü. "Class tilapurtem class magi atatsü atema telemtetba agiba ya coronavirus tashidak asendenshir poktetba aser tanurtem dak kongshitsü tsübua bilemba apir agiogo," ta Ratan Lal Nath-i ashi. Paisa, iba telemtetba ya Ketdangsürtem densen ka nung lepa reprangshitsü aser tensa apir temelenshi bener arutsü akok, ta ashi.

Pradyot-i booth 60-70 nung election agishitsü akhang

Agartala, Rongchii/April 8 (Agencies): Tripura royal scion aser TIPRA (The Indigenous People's Regional Alliance) mendenbuba Pradyot Debbarman-i, Mongolbarnü TTAADC election agiba sülen ano booth 60-70 nung election agishitsü khangogo. Agartala kübok Ujjayanta Palace nung osangbenertem den jembiba mapang TIPRA mendenbuba aser Tripura royal scion Pradyot Debbarman-i, TTAADC (Tripura Tribal Areas Autonomous District Council) election nung par party-i ayong ayonga takok angutsü temulung lema bilemba lemsatet. TTAADC elections Mongolbarnü (April 6) agiogo. Taoba mapang Tripur nung opposition party tongtiba CPI-M-ia, constituency 11 kübok booth 65 nung election agishitsü khangogo. Kasa mapang nung BJP den lokteper aliba party IPFT (Indigenous People's Front of Tripura)-ia constituency ka kübok booth 23 nung election agishitsü khangogo. "State kübok Golaghati, Pekarjala aser Takarjala amala constituency kar nung tia maka tatalokba kar atalokogo. Onoki kuli bendendar aser booth 60-70 nung election agishitsü akhangtsü," ta Pradyot Debbarman-i ashi. "Ni Tripura State Election Commissioner nem osang agütsüogo aser ozü party nungi lenirtemi Brehostibarnü election agishitsü akhangba booth tem indang list ka agütsütsü," ta Pradyot Debbarman-i ashi. April 6 nü agiba TTAADC election nung voter shilem 85-i vote ajentsüogo. TTAADC election ya constituency 28 nung agia liasü.



GOVERNMENT OF NAGALAND
DIRECTORATE OF EMPLOYMENT, SKILL DEVELOPMENT & ENTREPRENEURSHIP
NAGALAND, KOHIMA
Dated Kohima the 8TH April, 2021
ADVERTISEMENT

NO. DET - 7/12/2015: Applications are invited from bonafideindigenous inhabitant of Nagaland for undergoing training in various sectors through NEC funded Skill Training program as per details below;

Sl. No.	Details of Training	Name of Implementing Department	Contact details (Email, Phone, website)
1	Train 1100 Youth/Entrepreneurs in maintenance of tools & machineries	Agriculture Dept. & NSRLM	6009696907 trng.tools@gmail.com www.nsrlm.in
2	Skill Training for 1100 Youths on Machineries, processing & Business Management	Industries & Commerce Dept. PWD (Mechanical)	9863556449 industrynga@gmail.com 7005360470, 8974452807 esttce mech74@gmail.com
3	1100 Technicians to be trained in construction Sector	Labour Dept.	For Kohima, Phek, Zunheboto, Kiphire, Noklak, Tuensang, Longleng & Mon 9436001016, 9862199921 For Dimapur, Peren, Wokha & Mokokchung 9874055863, 9774482604 labcomm-nqi@nic.in

Note: Preference will be given to those candidates who have returned to the State due to the Covid-19 lockdown.

Sd/-
CHIDEN YADEN
 Director

Issued by DIPR

DEBTS RECOVERY TRIBUNAL, GUWAHATI
 Government of India, Ministry of Finance
 Department of Financial Services (Banking Division)
 Suwarna Bhawan, House No.12, New Town Path, G.S. Road,
 Ulubari, Guwahati-781007.

NOTICE OF DEMAND TO THE CERTIFICATE DEBTOR (S)
 (See Sections 25 to Section 29 of the Recovery of Debts Due to Banks and Financial Institutions Act, 1993 and under Rule 2 of Second Schedule of the Income Tax Act, 1961) D.R.P.C. No.07/2020

State Bank of India (SARB) Jorhat
 -Vs.-
M/s Johny Enterprises & Ors.

To,

- MESSERS JOHNY ENTERPRISE ABIPOU, C/O S/O PANTIMEI GONMEI, HOUSE NO.48, SUNRISE COLONY UNITED NORTH BLOCK II Burma Camp, DIMAPUR, NAGALAND.
- SHRI DIGAILUNG ABIPOU GONGMEI HOUSE NO.48 SUNRISE COLONY UNITED NORTH BLOCK II BURMA CAMP, DIMAPUR, NAGALAND-797112.
- SHRI JAMES GANGMEI HOUSE NO.23 RONGMEI COLONY DIPHUPAR VILLAGE, DIMAPUR, NAGALAND-797112.

Ld. Presiding Officer-i 05.02.2020 nü case No. O.A.69/2019 dak ajemdaker teküboklen agüja aliba osang den peta sentsü sen **40,37,072.17 (Rupees Forty lakhs thirty seven thousand seventy two & paise seventeen only)** aotsü atema nü nem tetuyuba agütsü.

1. Amount due as per the Recovery Certificate:	Rs. 34,60,429.80
2. Interest from 26.02.2019 to 02.09.2020 @10.75% P.A.	Rs. 5,39,642.37
3. Costs	Rs. 37,000.00
TOTAL	Rs. 40,37,072.17

- Osang agütsüba sülen **anogo 15 tsüingda** nü dang iba sentsüh aotoktsü tetuyuba agütsür. Tetuyuba agütsüba ama minyaktetra Recovery of Debts Due to Banks and Financial Institutions Act, 1993 Sections 25 nungi Section 29 aser Schedule of the Income Tax Act, 1961 kübok Rule 2 dak ajemdaker sentsüh agitsü.
- Temalen shisema aliba sen den nai
- (a) Recovery certificate (D.R.P.C. No.07/2020) dak ajemdaker iba mapang tatakzük tsüingda interest aotsü, koba recovery certificate agütsüba anogo nungi agizükba anogo tashi asütsü
- (b) Services of notices aser warrants aser tanga inyakyim mapang intokba senotsü ajak due aotsü atema agitsü.

March 22 nü kü nem agütsüba tashi aser seal dak ajemdaker iba osang metetdaktsü.

(S. KUMAR)
 RECOVERY OFFICER
 Debts Recovery Tribunal, Guwahati.



TIR YIMYIM YIMOBILEM (EDITORIAL)

DIMAPUR ROGONÜ, RONGCHII (APRIL) 09, 2021

Kaketshisatsü tali bushitsüba mapang

Corona Virus tashidak wara agi küm ka piyong kaketreju ma ser tang Nagaland Board of School Education (NBSE) kübok aliba kaketjutem nung class 10 aser 12 tatidang tenzükogo. Tang kaketshisatsü sayuba aser angazükbaren nung class ajak rongnung tongtibangtiba class-ji class 10 aser 12 ya lir, kechiyong class ter tatidang nung takok anguba jenjang jagi Arts mesüra Science mesüra Commerce azüngtsü asü mesüra mapang endoka degree aser diploma mebushiyonga pei jangraba mapa ka angazüksüsa training-i aotsüar, item rongnungji ka latettsü. Ibaji taküm lenmang shimteter asütsü. Iba sülen ano kodang class 12 tatidang agütsüdir, iba takok jagi tanur kaji kaketshisatsü bushiba lenmang nung kobaleni aotsüar teyutsü. Atangji, class 10 aser 12 nung takok jenjang tajung anguba mangubaji toktsür, taküm piyong asoshi inyaksüba mapa shimtetter asünungji, kechi azüngtsü shimtettir shimtetaka, pei jangraba mapa inyaksüsa shimtetsüla aser pei jangraba mapa jagi nübortem tajangzük angutsüsa inyaktetsüba mapa ka asütsüla. Tanurtemji shiba südir sang, class 10 aser 12 tongtetba tanurtemji techira aser tajung asütsü, anungji aikati mark tajung ngua takok angutsü. Aji oda, aiben asenoki tanurtem taküm piyong inyaksü atema azüngtsü asoshi telemtetba agidang, pa mesüra la dak kechi sempet ali ta masü saka science aser maths nung mark kwi angu ta asüba nung dang rangloker telemtetba agir. Ajisüaka, shiba südir sang marks agi masü saka pei dak aketba sempet agi dang pa mesüra la taküm piyong inyaka aotsüba mapaji shimtetsüla. Tanurtembo ajak tajung dang asünungji, ajaki takok angutsü saka yimya asünungji takok angurtem rongnunga tematiba aser mezüing jenjang nung takok angurtem alitsü. Ano, taküm amai balaka kaketreju khena moudang ser online nung dang class agia aruba sülen tatidang agütsür asünungji, tangari temulung melemba purtem toang akhidang nungi tajunga ta bilema alirtem dang nungi tajungba takok angutsüa akok. Aikati, yaküm küm piyong kaketreju nung class kena magidang ser tatidang agütsür asünungji junga magütsütettsü amai bilema alitsüa akok, ajisüaka tanü putu yabo Covid wara ali mali ta masü saka maparen ajak nung online putu kümogo. Iba jagi asenok akhidang ama nungdak alii dokan tonga maoyonga mobile phone ajanga meshir aser parnoki ki tonga bener arutsür. Iba kasaji asen temang nung tashidak aser taneptsü indang asüyonga mesüra asen taküm nungdak atema langka temetnuba asüngdangtsü asüyonga asen tonga maoyonga online nung asüngdanga teyari agitetter. Aji oda, tanurtem tatidang temer külena kong kechi azüngtsü telemtetba agidir, akhidang ama, admission form abeni tonga aotsü menügdaki kümogo. Iba ama putu ka nung class-i maoji ta mesüra school melapokji ta lesson mazüing aser mebushi kazürtembo kanga akoksatsü. Ibaji tangar gari aser tayimsü nung jajadang, asenbo akhidang nungi tetsüing agidang jajaa aruji tetsüing agi dang jajatsü ta bilema jajaba amai asütsü. Tanü asüing, joko alima agi ojangji, mobile melii tanura aser taina alitsü tasak kümogo, kechiyong ajak asoshi mobile phone ya nungdak oset ka kümogo. Ajisüaka, tanur asüyonga, tsürabur asüyonga shibai mobile phone nung nungdak makaba noksa reprangdang aser games asayadang mapang tao memetet odaktsür, itemjibo Covid wara maliyonga kanga akoksatsü. Talisa tanurtem asoshi mobile phone ya shisatsü bushidak tesem tajung ka lir, asenoki kechi metetner ajakji mobile phone nung enoka lir, anungji asenok lesson bushidang aser nungdak inyakba mapang, mobile phone-ji nungdak adokdang asüngdangdak tesayur ka ama teyari agitsüba dak alaka, kaket mazüing aser teka mapa kecha meinyak mobile amshia mekazütsüla. Kaketshirtemi metettsüba kaji, tatidang nung mobile phone nung aliba masü saka kaket nung aliba dang asüngdangtsü, anungji tatidang aliyonga maliyonga kaket azüngtsüba yabo yimya sübatsüla. Aji oda, sempet alirtemibo kaket azüingbaji dang masü saka kaket zülutsüla. Tang tashibo asenoki mobile nung reprangba aser azüingba ajakji tangari züluba aser enoktsübatem lir. Idakji asenok mapang aser rongsen endoker. Ajisüaka, tangar den toktepa asenokia asenoki bushitetba, yanglutetba aser zülubatem tangar nema züingdaksütsü aser reprangdaksütsüsa inyaktettsü atema, asenoka joko mobile phone amshiba nung masü saka shisatsü tasen bushiba nung mapang endoktsüla. Iba tangatetba nung, tanü putu kaketshirtem asoshibo akhidang dang nungi kanga agia temerangba meranga, kaketreju melapokiyonga pei kidang kaketshisatsü tali bushia tashi temetetter akümtsüba putu lir. Aji oda, school kiji dang kaketshisatsü angazükdak tesem ta bilemba to tejen shisatsü kümogo, kechiyong tanü putu nungbo asenok dangiang school arur aser asenoki school ki bener jajar.

OLEMSABANG

Yehu nungi tangazüksü kar

~ S. T. Yapang Lkr. Kohima

Yihuda chuba Ahazia aser Isreal chuba Yoram, tena tendak Tsüingrem nisung Elisha-i ainkar chir ka Yehu chuba asütsü asoshi totzü mezütsüa shimteti yokdang atalokbatem nungi tangazüksü kar bushidangdi.

2 Chubatem 8: 4 nungi 13 tashi nung tongtibang kar yamai shia angur "Anungji asangur ainkarji Ramoth-Gilead-i ao. Kodang pa aru, ajiang pai temeranger telok walunirtem sentepa angu aser ashi, "Oh walunir, ni nenok dangi osang ka kar". Aser Yehu-i ashi, "Onok koba dangi? Aser pai ashi "Ne dangi, Oh walunir." Anungji pa arameso aser kidangi ai; aser pai pa kolak nung totzüji shilokja ashi "Yamai Israel Tsüingrem KIBUBAi ashir, Ni na KIBUR nübur madak, oda Israel madak chuba asütsü mezütsüogo..." Idangji Yehu par kibur tenzükertem dangi aru, kati pa dang asüngdang, "Ajak junga lir ma? Kechiba iba yiar nisung ne dangi aru" Pai ashi, yamai aser yamai pai kü dang jembia ashi "Yamai KIBUBAi ashir, Ni na Israel madak chuba asütsü mezütsüogo." Idangji parnok nisung shiai apu jenjangma nung Yehu tetsüing kübok pei süoshi yutsütsü ilunga ao, aser Yehu chuba lir ta jangzü apu."

Yehu nunger mapang ainkar chir dangji "yiar" ta kati ashi aser külem angkupur aser walunirtem rongnungi aji songtemba Laishiba nungji zülua mangur. Mezüing "kechiba iba yiar nisung ne dangi aru?" ta shiaka, Yehu-i "pai yamai kü dang shia ni Isreal nung chuba asütsü totzü mezütsüogo" ta ashidangbo "aji tamagitsü" ta kasa angkupur jaki meshitet, kechiyong parnokia Tsüingrem o shitak tabo metet aser nisungji Tsüingrem nisung ajanga yokba ainkar chir ka tabo meteta liasü südi. Joko "Yiar nisung" ta ashisang to agi shinba "magitsü" ta ashitsü melen "Yehu tetsüing kübok pei süoshi yutsütsü ilunga ao, aser Yehu chuba lir ta jangzü apu" ta jangja shia angur.

Par angkupur kar asoshi ainkar chir ka arubaji yiar liasü, saka Yehu asoshibo külem angkupur rongnungi alakteta Israel chuba mendeni atuba anogo ka liasü.

Tsüingrembo metsübur, temoatsübo aginür. Tsüingremji züingshia mali, saka Tsüingrem nungi osangtsüsang kar lira ajibo yakta metetnür, kechiyong aji shitakba ataloktsü tabo meteta lir.

Kar asoshi Tsüingrem ya timtem mapang jenokdak, kar asoshi temoatsü meshidang bilemtetba Tsüingrem, kar asoshi tajung majung ajak nung kibur sädaktsüba Tsüingrem.

Na külem angkupur den asayatepa, benjongtepa, külemi yipa senzüa alitsü akok, saka ne taküm, ne mulungsentsü KIBUBAi agizüktsüsa lira, kenü anogo na balaka jatettsü akok, ibaji chuba mendeni metuaka kar asoshi taküm melenshiba, jenjang ajungketba, temoatsü kar anguba asütsüa akok.

Yehu ya Tsüingrem o kanga junga angaoka ayuba aser mapang shitak nung beshiba nübu ta angateter. Aikati Tsüingrem o pei ajung asa jembiba mesüra asayamenüba ajak nung amshiba angur. 2 Chubatem 9:25, 26 nung yamai shia angur, "Idangji Yehu-i pa tenzükter Bidkar dang ashi "... kechiaser ni aser na külemi tebu Ahab sülen sanger aodang koda KIBUBAi pa anema iba o jembizük, bilemtetang. KIBUBAi ashir 'Atangji ni yashi Nabot zü aser par chirtem zü nguogo, aser iba moapu nungsa ni ne nem tanaben lepa agütsütsü. Tang aji asünung KIBUBA o amato, pa bena arung aser pa ali nungji tokjang." Anosa 36 nungjia shia angur "Aser pai (Yehu-i) langzü "Ibai KIBUBA o lir, koba Pai Pa tenzükter Tishbi nunger Elija dang, Yezreel linük nung Yezebel shi azüi achitsü ta ashi."

Külem angkupur kati ainkar chir dang 'Yiar nisung' ta ajaba amaji tanü nai ochishia lidi asünung aika asoshi aji yiar mapa asütsü, tanü lima ochi mesükba aika lir item rongnung kar; scholarship agizütsü metemsüba nübutemi tsürabur itasen achir süaka aluyimer/sensaker ta zülur agizükba, aji joko asen lima yimya ka dang anungji shibai magizükknür pa/la dangji yiar ta ajatsü akok, takok tajung angur aser sensaker temsüa aliri agizükba aser yang nung jaki ter shilem agütsütsübaji tim, saka metemsüi alir aikati agizükter aser iba nungi ter shilem agütsüsdang arogoi magizüktsüla, aji ayuba nungi anungji arogoi tanubusang/tanutsülaji jar angateta shir meyipa agütsütsüla, ajimesüra arogo ya auyatsü sayuba reju ka ama akümtsü. Pa/la sensaker masü sürnung sensaker asoshi Govt-i yokba teyari jangotsü sensaker ama agiba. Lanurtema na tedong mayuba, taküm asüngteta aliba, opung nung asaya kecha mashiba; itemji ner angkupur aika asoshibo yiar mapa asütsü akok, saka iba jaki na kenü anogo temabai ajungkettsü koka lir.

Yehu-i ainkar chir arubaji ajitet südi mesüra pa ya ajak den kasa aliba walunir ka asü ta bilemer, parnok walunirtem sendena alidak ainkar chir arua osang sangoktsü dang, Yehu-i yakta dang "Onok koba dangi?" ta asüngdangba ajanga pa ya teyarinü, teti kokakolema aliba nübu ka liasü südi ta angateter. Nisung küma aotsü asoshi Tsüingrem temoatsü sülenbo meranga inyaka kokakulema aliba ya asütsü.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir

Pope-i Iraq semdangba sülen Khristan 23,000 Iraq-i meyipa ogo



March 7, 2021 nü Iraq kübok Mosul nung Pope Francis, Syriac Catholic Arogo Tenla ki tonga arudang pai teka ayiploksüba noksa nung angur.

Bhagdad, Rongchii/April 08, 2021 (Agencies): Tamalen IS kiralongrartemi Iraq nung yimti ishika agiba mapang nung Khristan aika tepset, aser Khristan aika linük balalai jenshia liasü, ajisüaka taküm March ita nung Pope Francis-i Iraq semdangba sülen Khristan kibong aika Iraq linüki meyipa odar, ta osang ka ajanga metetdaksü.

Pope Francis-i Iraq semdangba ajanga Iraq nung Khristantem nem teimla tasen ka agütsü, aser ibaji ajanga parnok aika pei limai meyipa aoer.

Iraq nung Nineveh Plains kübok Catholic jila tulutiba, Qaraqosh nung Khristan nütsüng 55,000 dak tema liasü, ajisüaka IS kiralongrartemi iba jila atsünga küm ana yimsüsüba mapang nung Khristan aikati iba jila toktsür jena liasü.

Centre ka nung putir, Ammar Yako-i, Pope-i linük semdangba sülen Khristan 23,000 bo linüki meyipa aruogo, ta metetdaksü.

Aid to the Church in Need nung Parliamentary & press officer, Fionn Shiner-i, "Saddam Hussein yimsüsüba mapang nung pai nütsüng yongsük sükdanga liasü aser iba mapang nung linük nung Khristan nütsüng million 1.4 liasü saka tangbo linük nung Khristan nütsüng 250,000 den tajemba lir. 2003 küm Iraq War

mapang nung Khristan nütsüng ajema aküm, iba sülen IS kiralongrartemi Nineveh plains atsünga agiba mapang Khristan nütsüng ano kanga agi tajemba aküm," ta metetdaksü.

Ajisüaka Pope-i linük yimtiba Baghdad densema Mosul, Ur aser Erbil yimitem semdangba sülen ita ka tsüngda Khristan aikati linüki meyipa arutsü telemteba agia aika aruogo.

Osangbener den jembidang Qaraqosh reconstruction board nungi Revan Possa-i, "Qaraqosh nungi ajenba kibongtemi Pope-i semdangba noksatem angudang ajep, aser kidangi shilangtsü atema shisadanga liasü," ta ashi.

"Yangi onok kümzuka alitsü atema anüdoklen linüktem nungi teyari nungdaker. Ni iba lima meimer aser yangi liner," ta pai ashi.

Qaraqosh jilai meyipa arur tesayur aser kaketzülur, Joseph Guiliana-i ashiba agi, pa France nung refugee ka ama liasü saka Pope Francis-i Iraq nung Khristantem dang Khristantem Iraq nung alitsü temeden lir ta nenshia ashiba ajanga pa ajungmesoa liasü.

Paisa, "Onok nem teimla agütsütsü atema onoki pai semdangbaji kanga nungdaka liasü. Iba li kiburtem ama onok yangi alitsü temeden lir ta onok nem teimla agütsü. Pope-i semdangba ajanga yangi aliba

Khristantem dang masü saka Europe aser America nung aliba Khristantem nem teimla tasen ka agütsü, aser teimla angurtem rongnung ni densema lir," ta ashi.

Batnaya nung Chaldean Catholic putir, Araam Romel Qia-ibo Khristantem dang, anüdoklen aliba linüktemi meyarira yangi Khristantem reshikangshiba manentsü, ta shiogo.

Putiri, "Khristantem maneni timtemtsü. Islamic temzung ajanga Khristantem aser minorities mekümzükra asenok maneni timtemtsü," ta ashi.

"Telungpurtem aliba den külemi sorkar maneni tashi meitra Khristantem aser minorities maneni reshikangshitsü. International linüktemi maneni asenok yaritsü, ta ni imlar," ta pai ashi.

Aid to the Church in Need (ACN) nungi Fionn Shiner-i, "Iraq-i tanaben meyipa aruba Khristantem kanga kümdanga alitsüla. Asen tamangba yimsü ya teimla aser tepela tamang ka lir, ajisüaka asenok kanga shisa kaa alitsüla," ta ashi.

"Khristantem Iraq-i meyipa arutetsü aser pei kidangi shilanga tesünap nung azükarua litetsü atema asenoki sarasademtsüla. Akhidang tenzükertem putu mapang ka nung asenok alir, anungji asenok kümküma alitsü atema asenoki sarasademtsüla," ta ashi.

Nigeria nung puer aoba pastor, Frederick Ojo Aramuwa tepsetogo

April 08, 2021: Nigeria kübok Ifira Akoko Ondo state nung mejangjaba nisungtemi pa gari anisang densema puer oa liasü," ta Daily Trust nungi Bola Ojuola-i metetdaksü.

"Asür pastor-i par jila

semadngba mapang nung mejangjaba nisungtemi pa gari anisang densema puer oa liasü," ta Daily Trust nungi Bola Ojuola-i metetdaksü.

"Pa March 31, 2021 nü samaa liasü, ajisüaka tesülen par jila, Ifira nungi kilometer ishika pilar aliba Ipele-Idoani-Ifira lenmang nung pa puer aoba osang jangjaa liasü," ta Bola-isa metetdaksü.

Par kibongi mejangjaba

nisungtem dang pa chioktsü mepishia liasü, aser parnoki akhangba ama sen-a agütsüogo, ajisüaka anogo ishika lir sülen pastor tasü mangji angu.

Pastor Ifira Akoko'er kibong züngsemtem aser pa atema mangyimer ajak asoshi sarasademjang, iba denji külemi Nigeria nung reshikangshi tia nung aliba tamangertem atema sarasademjang, ta kasa osang ajanga mepishia metetdaksü.

ANOGO ABEN TSÜNGREM DEN

Tanela temeshi kuli

"Pai parnok dang asüngdang, 'kodang nenoki amang, nenoki Tanela Temeshi agizükerama?' parnoki pa dang langzü, 'Tanela Temeshi ka lir ta asübaji onokibo mangashi-i liasü'. (T.Mapa 19:2)

Alimai tanü nisung mesükba robot ka tenüng agi Sophai ta sür yanglua lir. Nisung ama dang shih keter yanglu, nisung ama dang langzür, jembir, arakzür aser menür. Nisung ama komaka yangluaka laji robot, kechiaser la dak tangula aser temulungjang maden. Tanü tamanger, tenzüker aser arogo noksa yamaji asütsü tasak masü. Khristan tamanger, tenzüker, arogo tabo ajar saka Tanela Temeshi maka. Tenyartem mapa nung Efesa Arogo yamaji liasü. Paul-i Efesa arogo nung Tanela Temeshi adenba temaitsü mangu, arogoi Rajang angu. Kuli kaji parnok nisung 12 dang liasü (T.Mapa 19:7). Nütsüng 12 dang asüba tetezü Efesa yimtiji tulu aser nütsüng aika aliba yimti, saka parnoki kulisüba nung tashi meiti angu. Kechiyong Paul-i metet Tanela Temeshi adenba temaitsüji kulisüba. Piyazü inokba aamji mepokraki mali ama kodang Tanela Temeshi kadir mapa medeni malir. T.Mapa 1:8 nung "saka kodang Tanela Temeshi nenok dangi arudir.....nenok kü kulitem asütsü." Atangji Tanela Temeshi adenba taküm ka nung tinyaktsü tulutibaji kulisüba. Nenok Tanela Temeshi agizüker ama?

Sarasadem

Temem Yisu kü dak ne tanela Temeshi aliba ajanga ni ne kuli asütsü yariangma. Amen

Myanmar sepaitemi Kachin state nung Tenla kitem mita ao

April 08, 2021: Easter hopta nung Myanmar sepai- Burmese Army (Tatmadaw)-i Kachin state kübok Mohnyin nung Arogo aika mita ao.

Honibarnü (April 3) Northern Command sepaitemi Kachin Baptist Convention (KBC), Roman Catholic Association aser Anglican Association Arogo aika mita ao.

Osangbener den jembidang Mohnyin KBC nungi Rev. Awng Seng-i, "Parnoki (sepaitem) atsü alemdangba sülen compound nung aliba kiojen ajak mita ao. Sepai ketdangser ka ozü kidangi atu ki mita repring," ta metetdaksü.

Roman Catholic Association

nungi züngsem kati, "Parnoki ajak mita repring. Parnoki sepai anema longkak aitertem-a bushir," ta ashi.

Tenla ki compound nungji longkak aitertem rongnung lenir ka jenoka lir aser Khristan lenirtemi sepai yimsüsüba anema longkak aitba nung shilem agir, ta sepaitemi tai tongloktsü, ajisüaka Arogo meyong kiojentem nung parnoki tashishitsü kecha mangu, ta Khristan lenir kati ashi.

KBC Tir, Dr. Hkalam Samson-i, "Tashiyim amshia mita repringbaji kijai yimsüsüba temaitsü lir. Tamangba yimsü indang kiojentemji temeshi, anungji item tesem nung prangpong amshia nisung amokmerenbaji nisungtemi maginer," ta ashi.

France nung Tenla ki amaktsü merangba atema tetsür ka apu

April 08, 2021: Easter hopta nung Tenla ki ka amaktsü atema asalentong yangluba atema arrshi küm 18 tetsür ka puogo, ta French anti-terrorism investigators-i metetdaksü.

Tetsürlaji southern France kübok Beziers nung telidak liasü aser Easter Sunday nung lai Montpellier nung Tenla ki ka amaktsü asalentong yanglua liasü.

Anti-terrorism ketdangsertemi

ashiba agi, parnoki lar ki mita repringba mapang nung yaküm October ita nung Islamic kiralongrar kati tekolak tangzüka lepsetba school tesayur, Samul Paty indang noksa ka angu.

Ketdangsertemisa ashiba agi, lar kidangji bomb yangluba oset balala, Jihad kiralongrartem noksa aser anasa aliba Tenla ki noksa ka den Nazi aser IS kiralongrartem dak sendakba shidi kar angu.

OLONG PAITEP # 5776

Grid for OLONG PAITEP # 5776 with numbers 1-19.

TIPILEN and LANGTSÜNGLEN clues for OLONG PAITEP # 5776.

OLONG PAITEP # 5775 TELANGZÜBA

TIPILEN and LANGTSÜNGLEN clues for OLONG PAITEP # 5775.

Mojing-AOTSÜR-AOR DANG KANGA JASHIR : Questions and answers about Aotsür-Aor.

TANÜBO NAI LANGZÜANG: Sriram Sagar Project ya ___ nung lir. Multiple choice question.

AO OSHI ANGAZÜKDAK:

TANÜ ANGAZÜKTSÜBA OJANG

Balaka

(adj.) Tangar den meputep (different/unique) * Kinunger rongnung pa balaka chiyungdaksür

Bangdaka


(adj.) Taolen maka mouteti noktaktep aliba (stanstill) * Lenmang raksaba agi gari kata mouteti ajak bangdaka ayu.



Tir Yimyim

Happy Birthday

TENÜNG : SHISAREN I. IMSONG
Tasoba anogo : April 9
Küm : 11
Class : 5
School : Beanstalk, Lengrijan
Talidak : Aoyimsen
Happy birthday! Tsüngremi arishi talang moajang.
- Oja, Oba, Aküm, Laisen & Kinungertem



NAI-A YA METETTER MA?



Imran Tahir

IPL 2021 asayamung nung asayar tambusangji arishi küm 42 tain Imran Tahir aser tanubusangji arishi küm 19 tain Mujeeb Ur Rahman asayatsü renema lir.



Mujeeb Ur Rahman

SUDOKU # 5819

TELANGZUBA # 5818

Sudoku and Telangzuba puzzle grids.

OJANG LUTEP # 5363

Word search puzzle grid for OJANG LUTEP # 5363.

OJANG LUTEP TELANGZÜBA # 5362

IMLAA ATABA MATALOKDANG KARBO MASÜBA LENMANG NUNG AJEMOKA TAKÜM RAKSAR

TAN HOPTA ATEMA - KOMA SÜLA ?

Q. Myanmar nunger nübortem par lima nung sepaitem tsübuba agi süngjema melitet, parnok meyrirjang anasemka Nagaland nung khen atema tejenokdak bushia arua nunga koma süla ?



April 08, 2021 anepdang Uttar Pradesh kübok Prayagraj nung nisungtem gym nung exercise agiba noksa nung angur. Tang India nung anogo shia nisung aika dak coronavirus tashidak puteta arudar, aser tang tashi nung linük nung coronavirus case ajak senteperbo million 12.9 jungogo.

India nung ano nisung 126,789 dak Covid putet aser 685 asü

New Delhi, Rongchii/April 08 (Agencies): Tesüiba anogo ka tsüngda India nung ano nisung 126,789 dak coronavirus putet, aser tang tashi nung linük nung coronavirus case ajak agibo 1,29,28,574 jungogo; tang linük nung coronavirus agi teshirangdakpur lakh 9 dak tema jungogo, ta Brihostibarnep Union health ministry-i metetdaksü.

Tang linük nung iba wara tanabenbuba prokba nokdangtsü merangba mapang nung tang linük nung teshirangdakpur 9,10,319 jungogo.

Tesüiba anogo 29 tsüngda anogo shia teshirangdakpur

timba-timba kümдар aser linük nung iba tashidak agi shiranger anepba shilem tajemba küma 91.67 dang kümogo.

Taküm February 12 nü linük nung iba tashidak agi shiranger lakh 1 dak tema (1,35,926) dang liasü saka tangbo lakh 9 dak tema kümogo.

Tesüiba anogo ka tsüngda iba tashidak agi nisung 685 asü aser ajak senteperbo tang tashi nung nisung 1,66,862 süogo, ta health ministry data nung metetdakja lir.

India nung iba tashidak agi shiranger 1,18,51,393 anepogo aser iba tashidak agi shiranger asüba shilembo 1.29 dang

kümogo. Brihostibar tashi nung India nung coronavirus vaccine dose crore 9 dak tema agütsüogo, aser tang linük nung anogo shia dose lakh 30 dak tema agüja arudar.

Alima nung coronavirus tashidak timba putetba linük anaji United States aser Brazil na lir, iba sülen tasembuba jenjang nung India lir.

Brihostibarnü Indian Council of Medical Research (ICMR)-i ashiba agi, tang tashi nung India nung samples ajak agi 25,26,77,379 tendangogo aser iba nungji Bodhbarnü samples 12,37,781 tendangba densema lir.

Japan Ato kilonser, Suga-i India semdangtsü

New Delhi, April 08 (Agencies): Tan ita tatemlen Japan Ato kilonser, Yoshihide Suga-i India semdangtsü tebilemba lir, ajisüaka tang India nung Covid tensa apir anogo tejangja melemtet, ta Tokyo nungi sorkar osang ka ajanga metetdaksü.

"Japan-i 'free and open Indo-Pacific' mangdang

ataloktsü atema region nung linüktem semdanga linüktem den amalitepa inyakner, ajisüaka Covid wara nung ajemdaker sentongtem melenshitsü akok," ta kasa osang ajanga metetdaksü.

Taoba ita India Ato kilonser, Narendra Modi aser Japan Ato kilonser, Suga nati phone ajanga linük ana

tsüngda ano tajungba amalitepa inyaksü aser Indo-Pacific region atema amalitepa inyaksü asoshi jembia liasü.

Yoshihide Suga-isa China linüki East aser South China Sea nung ambangyima inyakba tebilemstsü lemsatepogo, ta kasa osang ajanga metetdaksü.



New Delhi, April 08, 2021: Brihostibarnü New Delhi nung Minister of State for Development of North Eastern Region (I/C), Prime Minister's Office, Personnel, Public Grievances and Pensions, Atomic Energy and Space, Dr Jitendra Singh-i India-Russia Friendship Car Rally-2021 tenzüksüba noksa nung angur.

OFFICE OF THE
CHANGTONGYA YIMSEN VILLAGE COUNCIL
 P.O- Changtongya, Dist.- Mokokchung, Nagaland- 798613
TENÜNGSANG AGÜTSÜR
 Wb. Late. Bendangmeren aser Wt. Amenla Ao na jabaso Wb.Rongsenkumzuk Fisheries & Aquatic Resources Department nung DFO/Asst. Director menden nungi Deputy Director jenjang ngutetba asoshi Changtongya Yimsen Putu Mendeni pa nem tetushi aser tenüngsang agütsür.
 Tarutsü ne wadang nung Tsüngremi maneni moajangma ta sarasademtsür.
 Sd/-
Wb. Chubasowa
 Chairman

Chhattisgarh nung Maoists-i apuba CRPF commando chiokogo

New Delhi, April 08 (Agencies): Brihostibarnü Maoists telungpurtemi parnoki pua aliba CRPF CoBRA commando, Rakeshwar Singh Manhas chiokogo; April 3 nü Chhattisgarh kübok Bastar nung Maoists telungpurtemi sepaitem amakba mapang nung Manhas pua liasü.

CRPF indang elite unit CoBRA (Commando Battalion for Resolute Action) nungi commando, Rakeshwar Singh Manhas ya Maoists den raraba sülen samaa liasü. April 3-4 anogotem nung Maoists den khatepdang sepa 22 tashi süogo.

Tamalen Chhattisgarh Police-i, Maoists telungpurtem nem Manhas chiokdaksütsü atema parnoki meranga inyakdar, ta metetdakja liasü.

CRPF sepa 1, Manhas kinüngtsüia Jammu nung la kinüngbu chiokang, ta takhangba agüja longkak aitba nung shilem agia liasü.

Mongolbarnü CPI (Maoist)-

i sangdong ka ajanga, khatepba tesem nung parnoki Manhas puogo, ta metetdaksüba den külemi pa chioktsü atema tiyongtsü nung inyakertem shimang ta Chhattisgarh state sorkar nem metetdakja liasü.

April 2 aonung nungi tenzüka sepaitemi Chhattisgarh nung Maoists telungpurtem mita aoba operation tenzüka liasü aser April 3 nungi Maoists den raraba mapang nung sepa pongu asü, aser tasingnüa sepa 17 asü; ajak senteperbo sepa 22 asü.

Sepa asürtemji Central Reserve Police Force (CRPF), elite unit CoBRA (Commando Battalion for Resolute Action) aser District Reserve Guard (DRG) nungi lir, ta ketdangsertemi metetdaksü.

Hokolbar aonung nungi tenzüka security sepa 2,000 dak temai Bijapur aser Sukma districts arrtsülen telungpurtemi anema Cordon & Search Operation (COSO) tenzüka liasü.



April 08, 2021 nü CPI(M) lenir Brinda Karat aser Uttarpara Constituency nungi party candidate, Rajat Banerjee nati West Bengal Assembly election atema nüboyimba sentong ka nung shilem agiba noksa nung angur.

Army tongti, Gen Naravane-i anogo 5 nü atema Bangladesh semdang

New Delhi, April 08 (Agencies): Army tongti, Gen MM Naravane-i Bangladesh anogo pongunü semdangtsü atema Brihostibarnü apusoa ogo; iba mapang nungji linük ana tsüngda lenla balala nung amalitepa inyaksü atema pai lenirtem den jembitsü.

Hopta ana tejaklen Ato kilonser, Narendra Modi-ia Bangladesh semdanga liasü. Brihostibarnü Gen Naravane-i Bangladesh liberation war nung asürtem nem akhüm agütsü aser service

chiefs asem den temeja senden menogo.

April 11 nü pai Bangladesh foreign minister den senden amentsü.

Army tongtiisa Bangladesh Institute of Peace Support & Training Operations (BIPSOT) züngsemtem den o lemteptsü, UN peace support operations seminar nung adentsü aser 'changing nature of global conflicts: role of UN peacekeepers' senden nung okila jembitsü, ta Army otongdar kati metetdaksü.

Myanmar nung longkak aiter aser mitkartem khateper

Yangon, Rongchii/April 08 (Agencies): Myanmar nung mitkartemi sorkar atsüngdokba anema longkak aiter temi security forces den teka agi yangluba prangbong aser firebomb rara saka longkak aiter nisung 11 tepset, ta yangji aliba osangtema ajanga Brehostibarnü ashi.

Taze jila nung longkak aiter azüoktsü atema sepai truck trok nung arua liasü, ta Myanmar Now aser Irrawaddy news ajanga ashi. Longkak aiter temi teka agi yangluba prangbong, kotari aser firebomb amer rara aser sepai ano truck pongu nung arusem.

Brehostibarnep tashi maneni rara aser longkak aiter tajemba agi nisung 11 tepset aser 20 shi yiru, ta osang ajanga ashi. Sepaitem asüba osangbo tang tashi kecha mali.

February 1 nü mitkartemi election ajanga shimteta aliba Aung San Suu Kyi'er sorkar atsüngdokba sülen tang tashinung security forces temi civilian tepsetba nisung 600 dak tema kumogo, ta Assistance Association for Political Prisoners (AAPP) ajanga ashi. Bodhbar nikongdang tashinung asür nisung 598 liasü.

Taze ya Kale jila anasa lir, kong Bodhbarnü sepai aser longkak aiter tsüngda kasa yimya nung raratepba mapang nisung 12 tepseta liasü, ta osang balala aser tenük kuli alirtemi



Mitkar tashi amshia sorkar atsüngdokba anema nokdakertemi Yangon, Myanmar kübok Kamayut township nung shishilempaba tesem ka ajanga Myanmar lenir Aung San Suu Kyi indang noksa amer aoba angur. Mitkartemi sorkar atsüngdoka tejashi sayua parnoki Kamayut township nung shishilempaba tesem aser yimtung nung yimyim ayima jaja.

ashir. Suu Kyi'er sorkar tanaben amenokjang ta takhangba agüja nokdaker dak security forces temi injang, grenade aser machine-gun amshia liasü, ta AAPP ajanga ashi.

"Taze aser Kale nung shikarir aika lir. Anungji parnok kabu nung teka agi yangluba nok-o-nü lir. Aser tang parnok nüburtem kumzüksü asoshi item nok-o-nü bener temai adoker, kong mitkartemi nüburtem dak amaker," ta iba region nung alir aser youth activist Hein Min

Hteik-i ashi.

"Nüburtemi pei takum aser temeden wazüka ayutsü merangtsü," ta taoba mapang sorkar nung minister inyaka alir aser tang CRPH nung züngsem kati ashi. CRPH ya tang atsüngdoker aliba civilian sorkar asoshi nokdakba oziung yanglur telok ka lir.

"Nüburtemi CRPH matatsü. Nüburtemi nok-o-nü amer nokdakba CRPH ajanga menokdangtetsü," ta iba nisungba yagi osangbener dang

telephone ajanga ashi. Brehostibarnü mitkartemi model aser actor Paing Takhon apu, shibai mitkartem anema jembia liasü, ta pa tenüi osangbener dang ashi. Myanmar nung yimti tulutiba, Yangon nung activist temi longkak aiter asürtem bilemteta tsüngsem nung naro inoker yutsü.

Tang nisung 2,847 pua yua lir, ta AAPP ajanga ashi.

Iba den külemi nisung noklang aika aputsü totuyuba agütsüogo, kong mitkartemi tan hopta nisung atsür arur, entertainer, artist aser kentenertem anema apuso.

Myanmar aser Thailand nung kanga jangja meteta alir arishi küm 24 tain Paing Takhon ya nungtugu nisungtem apur rongnung tasenba alitsü. Pai mitkar inyakyim aitsü aser Suu

Turkey nung COVID-19 tashidak tali akumer

Ankara, Rongchii/April 08 (Agencies): Turkey nung tesüiba ghonda 24 tsüngta coronavirus cases 54,740 liasü, ta health ministry indang data nung Bodhbarnü menur sayua tashidak wara tenzükba sülen anogoshi putetyonga aruba rongnung tematiba alitsü.

Kasa mapang nisung 276 asü, koba tashidak tenzükter anogoshi nisung asüba nunga timtiba alitsü, aser tang tashinung iba virus agi asür ajak senteper 32,943 jungogo.

Turkey nung COVID-19 mozü doses million 17.97 jungnüa agütsüogo, aser January 14 nü linük tesem

ajungalen COVID-19 mozü agütsü tenzükba sülen tang tashinung iba mozü dose mezüngbuba ya nisung million 10.55 shi nem agütsüogo, ta health ministry data ajanga sayur.

March ita tatemlen Tir Recep Tayyip Erdogan-i coronavirus tenokdangbatem tali akangshitsü sangdong, aser yangji Muslim nungter temeshi ita, Ramadan mapang linük ajunga nung hopta tatemi lockdown benokba dena lir. Muslim nungter Ramadan ya April 13 nung tenzüksü.

Linük nung aliba province 81 nungi 58 nung "red" mesüra

"very high-risk" zones ta asazüka lir, aser yangji Istanbul aser linük yimtiba, Ankara dena lir.

Ramadan ita mapang Muslim nungertem lokti adenshia chiyongba sentong nokdangter, koba taoba küma nokdanga liasü.

Anepbong aser aonung lokti chiyongtsü asoshi adenshibatema memelar.

Maneni linük tesem ajunga nung Ramadan mapang restaurant aser café tema shibangtsü. Anogoshi aonung 9:00 ako nungi anepdang 5:00 ako tashi curfew benokba maneni alitsü.



Sao Paulo, Brazil kübok Vila Formosa cemetery nung inyaker temi tashidak nungi kumzüksü süoshi agir COVID-19 agi asüba nisung ka indang süngten leper nung inokba noksa nung angur. Sao Paulo yimti nung anogoshi leper tasen 600 bendenloker.

Kyi busemstsü nangzüka liasü.

Pa tenu Thi Thi Lwin-i osangbener dang ashiba agi, mitkartemi la teti ya Yangon nung par tsürabur kidang anepdang 4:30 ako nung apu, kong pa temang majung anogo ishika mungzüka liasü.

Security forces tem military truck ti nung sepai 50 shi mener aru aser pa ya koloni anir aoar memetet, ta lai ashi.

Myanmar nung asayamenür (comedian) nungtugutiba, Zarganar ya Mongulbarnü apu, ta osang ajanga ashir.

Bendang lima nung Myanmar indang diplomatic mission tem ketdangsütsü asoshi Bodhbarnüa atsütepa liasü.

Myanmar ambassador to London, Kyaw Zwar Minn-i ashiba agi, pa embassy telungi maitdaksü. Pa indang deputy ajanga pa embassy telungi maitdaksüi shibanga ayu aser mitkartem tenüng nung inyak, ta osangtem ajanga ashir.

Kyaw Zwar Minn-i mitkar yimsüsürtem den tesendaktep raksa aser civilian lenir Suu Kyi chiochtsü takhangba agütsü.

"Ibai London tiyong nung mitkar tashi amshia sorkar atsüngdokba mesük lir... parnoki ni aliba atsüngsepba nenoki angutsü," ta pai osangbener dang ashi.

Danga linüktem nunga iba mesükba osangtem angazüka lir.

Kasa mapang mitkar lenir, Senior General Min Aung Hlaing-i Bodhbarnü sangdong ka nung, "civil disobedience movement mesüra CDM ajanga mozüki, school, lenmang, office aser factory nung inyaksangshi anendaktsüogo," ta ashi.

"CDM ya linük samatsütsü inyaksangshi ka lir," ta pai ashi.

Kyrgyzstan tsür ka pua bener oa tepsetba sülen longkak aiter

Bishkek, Rongchii/April 08 (Agencies): Pua bener aoba tetsür ka tepsetba mechi police temi kecha mesütetba atema nisung noklang aika Kyrgyzstan interior ministry jakdang Brehostibarnü longkak aita lenir anentsü takhangba agütsü.

Arishi küm 27 tain Aizada Kanatbekova ya April 5 nü tashiyim agi pua bener ao aser anogo ana lir gari nung lenseta sür lia ngutetr, aser la den külemi la tepseter südi, ta temolung meleme bilemba nisung ka kotari agi yiruba ajanga sür liasü, koba pei sasa yiruba amai liasü.

Pa den külemi alir südi ta temolung meleme alir ka pua lir.

Tashiyim agi pua bener aoba ya camera nung car model aser number plate tejangja nguaka police temi temolung melemteti alisang meputetba mechi nüburtem ain adok aser ketdangsürtem mapa nungi anentsü akhang.

Linük yimtiba, Bishkek nung aliba ministry indang headquarters jakdang Brehostibarnü nisung 500 shi

adenshia "Maksü!" ta ayimtena liasü.

Ato Kilonser Ulugbek Sharipov-i longkak aiter ajurua iba ken o bushisüngdangtsü atema police nem mapang agüjang, ta nüburtem dang asüngdanga liasü.

Tir Sadyr Japarov-ia sangdong ka nung aibelener merenshitsü, ta ashi. Paisa kiyimla pua bener aoba yimya aitsü. Kyrgyzstan nung ketdangsürtemi temerenshi agütsütsü nangzüka liaka kiyimla pua bener aoba yimsü ya tang tashi kanga bulua amshiteper.

Iba yimsü nung kiyimsangi tashiyim agi tetsür ya par kidangi anir oa pa den kibong akumtsü molunger ta tezüluba nung agütsütsü ajungshir.

Kyrgyzstan nung iba yimsü ya 2013 küm nungi mamshitsü oziung yanglu, kechiaser iba ya ajanga tashiyim agi shi nung medemba, kilung nung azüdokshiba aser tekolok raksatsür, ta ketdangsürtemi asadangteta liasü.

Longleng DPDB senden nung Health camp indang metetdaksü

Dimpur, Rongchii/April 8 (TYO): Longleng District Planning & Development Board senden April 6 nü Deputy Commissioner, M. Shayung Phom lenisüba kübok DC Conference Hall nung menogo. Senden nung DC-i Covid-19 tashidak prokshia aoba aziüoktsü atema tawa benokba SOPs indang metetdaksü. DC-isa, züngsemtem dang lokti nung tetsüingda ita inyaksangshitsü, teka mapangshia metsüoktsü aser face mask amshitsü ayongzük. Züngsemtemisa jila telongtet nung district administration aser Police na longjemer aibelener dang senchi dena chia Covid-19 SOPs tem ajang ajanga benoktsü telemteba agi. Iba dak sendakba nung DC-i züngsemtem dang pei aliba tesem nung nübürtem nem tangazükba agütsütsü mepeshia asüingdang, ajita asünungdang nübürtemi khuret angateta lokti nung tashidak menatepa aoba aziüoktetsü.

Senden nungsa züngsemtemi Dr. T. Ao Trophy nung Longleng district shilem agitsü telemteba agi. Longleng District Football Association tir Patham-i, asayartem atema coaching camp ayongzükba katsüba aser senotsü agi tetsükdaksü adokba indang lemsatet. Paisa, taoba kümtem nung ketdangsurtemi senotsü teyari agütsüba aser teka amteper inyakba atema pelaba lemsatet. Kasa mapang nung CMO Longleng, Dr. Obangjungla-i, ear & hearing dak sendakba nung PowerPoint presentation ka agütsü. Laisa, April ita tepeyong tenüng bendenba sülen district nung Ear & Hearing atema Charity Screening Camp ayongzükba katsütsü ta metetdaksü. Dr. Obangjungla-i züngsemtem dang iba osang belenshitsü mepeshia asüingdangba den screening camp magitsü tsüingda present PowerPoint presentation agütsütsü

nüngdaka liasü, ta ashi. Lai, tenarong ajakba indang kuli balala, anepalu masüba ajang mangashi akümba aser memeno tsüingda anepalutsü nüngdakba indang metetdaksü. Laisa, CHC Centre Yachem aser Tamlu, Yongnyah, Shakshi, Pongo nung PHC center tem aser district kübok tanga health center tem nung tenüng züngoksemtemtsü, ta ashi. Camp ya tenüng züngoksemba sülenang agitsü, kechiyong iba dak ajemdaker medical equipment aser facility tem anepalutsü, ta lai shisem. Maneni senden nung EE PHED, Longleng-ia, Jal Jeevan Mission (JJM) indang jemi aser iba mission ya 2024 küm tashi nungbo functional household tape connection (FHTC) ajang kibong shia nem tajemtsü tzü temerek agütsütsü nükjidong nung amenok ta ashi. Paisa, iba sentong takok ngua benoktsü atema state, district aser block level nung committee balala tenteta lir ta ashi.

MULUNGNEN O



ASO: 05/11/1930

ASÜ: 31/03/2021

Temeim ojala, asür **Tatongjungla Tzuditzur**, mapang tatsüka temang nung timtem aser mekokmein agi tonger aliba mapang nungi akumli tempangba anogo tashi kija, lokti balala aser temeimertem shirnokisa sarasadem, nubu aser rongsen agi nungita yariogo nenok ajak dang kangasa pelaba lemsateper.

Asen teyanglur, takar aser tulusang Tsüingremi, nenok ajak maneni moshia moajangma ta onok sarasadem.

Temeim Chirurtem, Semchirtem aser Kinungertem

OFFICE OF THE
MONGSENYIMTI LAISHIR TELONGJEM
P.O: Chuchuyimlang, Mokokchung, Nagaland
TENUNGSANG AGUTSÜR

1. Wb. K.N Temjen Jamir aser Wt. Ladongla Lemtur na jabaso **Dr. Menjiwapong Jamir**, shiba tang Allahabad Bible Seminary nung Assistant Professor teinyakdak lir, Pa ya Mongsenyimti Laishir rongnungi Tsüingrem o tarok rajema metettsü jangraba aser sayutsü molungtetba lanur tajung ka aser Tsüingrem O nung nangri kanger ngatet ngateta liteta sayuba tesayur ka lir. Pai Senate of Serampore College (University) SATHRI nungi Dissertation "**Environmental Dimension of Eschatology an Ecological Reading of 2 Peter 3:1-13 and its implication for creation care among the Nagas**" nung zülua Doctor of Theology (D.Th) renema Mongsenyimti Laishir Telongjem nem konang nüngsang tulu bentsür aruba tepela tulu asoshi pa nem tenüngsang tetushi agütsür. Tsüingrem o bushiba nung temaba jenjangi atuba ajang ano pa tenzükba mapa nunga takok tulu ngua inyaktetsü asen Laishirtemi yongyaseta sarasademtsür. Tajung Tsüingremi na aser nur kibong Pa tenzükba mapa asoshi tali moajangma.



2. Tsüingremi sannüoktsü mezüja shimtetba meteta bendanga agüja nentaka Pa mulung sua tenzükur **Rev. Aowapang Ozüküm** asür Imkongramok aser Tzüzainla na jabaso tambusang Guwahati Ao Baptist Arogo nung sannüker inyaka lia Pa takum, kibong tanela jenjang aser lennisüba ajak tendanger mulung sua tapet mapang nung Ao Baptist Arogo Mungdang (ABAM) ajang ordination agütsüba asoshi pelar. Iba ya ajang Arogopurtem ajak aser talisa Mongsenyimti Laishir Telongjem nem Tsüingrem tenzükba nung tematiba jenjang tongtetba konang nüngsang bener arutsuogo ta pelar. Tsüingremi tarutsü anogotem tali temoatsuba südakjang ta Laishir ajaki sarasademtsür.



Sd/- Wb. Likoknungsang Ozüküm **Sd/- Wp.S. kümüz Lemtur**
President, MLT Gen. Secretary, MLT

OFFICE OF THE
MOSEM SEMCHIR TELONGJEM
H.Q: MOKOKCHUNG- 798601,
NAGALAND

Ref. No _____ Date _____

AYIMOKTSÜR

Mosem Tebütsü Likumsangla Longkumtsür, Tena Chir adianu Pungo lir
1. Lumongdong 2. Mongka 3. Metsübo 4. Waja aser 5. Tamang.
Item tebou Pungo ya Ao Lima yimsüng balala nung soyapokya-a O-a lir.
Anungji kari danga ozü tebou pungo ya lemsaja jembiba mesüra osang kaket ama nung zülua adoktsüdir, Mosem Semchir Telongjemi tai madoktsü aser tatem tashi bushitsü.

1. Lipokmeren, Tatar (Lumongdong Jamir): *[Signature]*
2. Imsutoshi, Tatar (Mongka, Jamir): *[Signature]*
3. Limaakum, Tatar (Metsübo Jamir): *[Signature]*
4. J. Temjen, Tatar (Waja Jamir): *[Signature]*
5. T. Bendang Jamir (Tamang Jamir): *[Signature]*

-Sd- -Sd-
(TALIMEREN) RONGSENMONGBA)
Gen. Secy.MST President, MST
H.Q: Mokokchung H.Q: Mokokchung

SANGDONGER

Süngdong lu ayimer atema agütsüba aliba Nursery Farm nungi süngdong (Saplings) peria angutsü.
1. Pine Tree (three types) 2. Kisamen (Kokon)
3. Ongpangkongsülem (Alder) 4. Auo (Hollock)
5. Yongjak 6. Aghor, Bakul, Sandalwood
7. Süngjang - Mango, Orange, (Red+White)
Seedless litchi, tamol, lemon, pomegranate etc, angutsü.

SHIM KI MPCS NURSERY FARM
MAREPKONG WARD, MOKOKCHUNG
9862127345 / 9436439716

Oppo F19 India nung sayaogo

Rongchii/April 8, 2021 (Agencies): Oppo company-i Oppo F-series a senden shir India nung Oppo F19 sayaogo. Oppo F19 ya taoba ita India nung sayaba Oppo F19 Pro aser Oppo F19



OPPO F19

Flaunt your *Nights* with
33W Flash Charge

AMOLED Punch Hole Display
5000mAh Long-Lasting Battery

₹18,990

PRE-ORDER NOW

FLAT 7.5% CASHBACK

OPPO BANK

camera setup nung 48-megapixel primary camera ka, 2-megapixel depth sensor ka aser 2-megapixel macro camera ka keta lir. Phone nung tejaklen selfies aser video calling atema 16-megapixel shooter ka inokja lir.

Oppo F19 nung

primary camera yagi EIS support agia 30fps nung full-HD video tangoktetsü. Oppo F19 indang camera app nung night shot, panorama, portrait, time-lapse, slow-motion, hypertext, aser Google Lens amala modes tem mezüingyongi keter arutsü.

Tanga features tem rongnung Android 11, face unlock, dual-SIM support, Bluetooth v5.0, dual-band Wi-Fi, aser 4G LTE densema lir. Shisema aliba ama iba phone nung 33W fast charging supports asüba 5,000mAh battery ka inokja lir.

inch full HD+ AMOLED display panel, den 800 nits peak brightness, 409ppi pixel density, aser standard 60Hz refresh rate keta lir. Display panel tekolaklen tabelen nung selfie camera atema hole-punch cutout ka keta lir. Kasa mapang nung iba phone telung nung Qualcomm Snapdragon 662 SoC den 6GB LPDDR4x RAM aser 128GB internal storage inokja lir.

Temetetsükaji Oppo F19 Pro aser Oppo F19 Pro Plus nung MediaTek Helio P95 aser MediaTek Dimensity 800U processors keta lir. Camera dak sendakba nung triple rear

Pro Plus den yongrü ka nung lir. Pro phone tem ama masü vanilla Oppo F19 tasenba nung triple rear camera keta lir. Ajisüaka 33W fast charging support asüba 5,000mAh battery ka keta aliba angutsü. India nung iba phone 6GB + 128GB storage variant sen 18,990 agi Midnight Blue aser Prism Black sentsü nung angutsü. Oppo F19 ya online aser offline channel balala nung mekazüka ayu tenzükogo aser April 9 nü nungi ayok tenzüktsü. Specifications dak sendakba nung Oppo F19 nung nung 6.43-



Phek Town Local ground nung April 7 nü 'OP SADBHAVANA' omen nung ajemdaker tantsür tambur aser pensioner tem atema angati medical camp ka ayongzükba katsüogo. Iba medical camp ya Phek District Pensioners' Association (PDPA)-i achaayanga, 22nd BAIS BAHADUR Assam Rifle, Phek Battalion-i senotsü teyari agütsüba den nubu agüja agiogo. Camp sentong Phek District Pensioners Association (PDPA) tir Yeveyi Sapuh-i lenisüba kübok agi aser Medical team nung Captain Abdul Sharma, MBBS/RMO, 22nd AR, Phek, Dr.Sivesh Varshan; Medicine Specialist Dr. Ngupelo Koza; MO, Dr. Victoris Seb; Skin Specialist, Dr. Neikhrielle Khro aser SDO(C) Phek, Samuel Thyug densema liasü.

2buba State Level Sobaliba Asaya tenzükogo



Kohima, Rongchii/April 08, 2021 (TYO): Brehostibarnü (08.04.2021) Indira Gandhi Stadium, Kohima nung Commissioner & Secretary, Youth Resources & Sports, Alun Hangsing-i 2nd State Level Indigenous Games Competition tenzüktsüogo, ta sangdong ka ajanga metetdaksü.

Iba sentong nung Hangsing-i, akhi tejen putu mapang nungi saisapongtem asaya aru. Ajisiüaka, kum tem süia aruba mapang iba ya asenok takum nung shilem ka ama kumogo,

ta ashi. Indigenous saisapongtem nung temulung agütsüsüla, kechiyong iba ya asen sobaliba den arok aroka sendaktepa lir, ta pai ayongzük.

Temang anema alitsü dak sendakba nung, Department-i scheme aser sentong balala atongdar, ta Hangsing-i ashi.

2028 Olympics tashi nungbo India Sorkari linük nungi saisapongter tajung aika shilem agidaksütsü nükjidong yur inyaker asünung, state nunga saisapongtem ajungkettsüsü

tongtibang indang nung pai jembli.

Iba sentong nung Assistant Director, YRS, Nyuvithu menden liasü. Telok pela agizükba mapang pai, State Level Indigenous Games Competition, koba kum shia ayonga asayaba asayamung ka ama lir, iba asayamung 2019 kum tenzuka liasü, ta ashi.

Anogo ana tashi ayonga asayatsü aliba asayamung nung district 11 nungi shilem agidar, ta kasa sangdong ajanga metetdaksü.

Wicket timtiba agitsü mangdang lir: Mohammed Siraj

Chennai, Rongchii/April 08, 2021 (Agencies): India nung fast bowler tasen Mohammed Siraj-i pa nem agütsüba maongkatem tajungtiba nung amshia aser kenü anogo India nung cricket asayar rongnung wicket timtiba agir ka akümtsü mangdang lir.

2017 kum November ita New Zealand aser India na tsüngda T20Is nung arishi kum 27 tain Siraj-i mezüng asayaba sülen nungi India atema pai Tests pungo, ODI ka aser T20Is asem tashi asaya lir.

Siraj, shibai IPL nung Royal Challengers Bangalore atema asaya lir, pai ashiba agi, cricket format asempronlga nung asayaner aser ni takok anguba ajak Jasprit Bumrah aser Ishant Sharma atema alitsü.

"Bowling aonba mapang (net training), Jasprit Bumrah-i

tesülen nungi reprangasa ata. Nüngdakba tem shitak inyaksü aser talila puraloka ball maontsü asoshi pai teti kü dang ashi. Tajangshiba aika alir asayar ka dang nungi angazüktsü ya jangratemsüka lir," ta Twitter ajanga Siraj-i lemsatap.

"Ishant Sharma den asayadangogo, pai Test 100 tashi asayaogo. Dressing room nung pa den sensaksemtsü tajung. India atema wicket timtiba agir ka akümtsü kü mangdang lir aser shilem agitsü maongka anugba ajak nung ni meranga asayatsü," ta Siraj-i ashi.

RCB atema Siraj ya asayar tongtibang ka lir aser IPL asaya 35 nung pai wicket 39 agiogo.

Squad nung mezüng adandang kü sasa temulung melemtet, saka KKR den asayadang tebilemba melenadok, ta Siraj-i ashi.

"Taoba kum ni RCB nung adandang, kü sempet nung teimla meliasü. Ajisiüaka, ball tasen agi bowling asütsü tenzükba mapang ni bilemba ama asayatet aser iba jagi ni kanga nungita yariogo. Iba den külemi team pur KKR den asayaba mapang ni teimla tulu angu. RCB nung team sobaliba kanga tajung, kong ajak dak telongjem tanela lir aser Virat ama ajak dak tebilemba kasa lir," ta pai ashi.

RCB indang batting consultant Sanjay Bangar nungi telangzüba tajung anguba sülen, Siraj-i bowling nung maneni temulung agütsüsü lemsatap.

"Sanjay sir den jembiba mapang, kü bowling yimya nung pai telangzüba tajung agütsüogo. India team nung asayaba ama kasa sempetji amshia maneni shilem agitsü asoshi pai kü dang shiogo," Siraj-i ashi.

Ligue 1: Neymar asaya ana nungi nokdang

Paris, Rongchii/April 08, 2021 (Agencies): Taoba hopta tatemlen (Honibar - 03.004.2021) Paris Saint-Germain aser Lillie na tsüngda asayaba mapang Brazil star Neymar asaya nungi tukudaktsüba sülen, Ligue 1 asaya ana nungi pa nokdang, ta French Ligue sangdong ajanga metetdaksü.

Iba asaya nung Neymar-i asaya dak mapet yimya benshia Lille indang Tiago Djalo nungoktsüba atema pa nem yellow card tanabuba - red card agüja asaya nungi tukudaktsü. Kasa mapang Tiago-a asaya nungi tukudakja liasü.

Tenaprongla asaya nungi tukudaktsür sülen-a, hallway nungi dressing room tashi

Neymar-i Tiago den tebang agi raratep.

French league-i asaya ana nungi Neymar nokdangtsü sangdongba sülen, tongtibang asaya ana - Strasbourg (April 10) aser Saint-Etienne (April 18) nung pai kulem team pur den masayatetsü.

Tang Ligue 1 table nung Defending Champions PSG pur point asem agi temaba jenjang nung alir Lille tesülen lir asünung, par telok atema asaya anaprongla tongtibang asütsü. Iba league nung Paris pur asaya tenet anünga lir.

Neymar Barcelona nungi PSG nung adenba sülen season nung pa asaya nungi pezüben taker alitsü aser tan campaign nung tanabenbuba alitsü.

Ajisiüaka, Bodhbarnü Allianz Arena nung UEFA Champions League PSG-i defending champions Bayern Munich akokba mapang, Neymar-i kanga junga asaya liasü. Iba asaya nung pa teyari ajanga goal ana tashi angu. Iba jagi asaya tenzük minute 4buba nung Kylian Mbappe-i mezüng goal aser minute 28buba nung PSG captain Marquinhos-i telok atema goal tanabuba idaktsü.

Bayern-ia telangzüba tajung agüja minute 37buba aser 60buba nung Moting o Mueller na kolak agi goal ka ka tongokja telok ana tsüngda goal 2-2 kumadok, saka minute 68buba nung Mbappe-i ano goal tanabuba idakja PSG puri 3-2 agi mezüng leg indang quarter final akok.

IPL 2021: Full Schedule

Anogo	Asaya	Mapang	Tesem
April 9	MI vs RCB	7:30 pm	Chennai
April 10	CSK vs DC	7:30 pm	Mumbai
April 11	SRH vs KKR	7:30 pm	Chennai
April 12	RR vs PK	7:30 pm	Mumbai
April 13	KKR vs MI	7:30 pm	Chennai
April 14	SRH vs RCB	7:30 pm	Chennai
April 15	RR vs DC	7:30 pm	Mumbai
April 16	PK vs CSK	7:30 pm	Mumbai
April 17	MI vs SRH	7:30 pm	Chennai
April 18	RCB vs KKR	3:30 pm	Chennai
April 18	DC vs PK	7:30 pm	Mumbai
April 19	CSK vs RR	7:30 pm	Mumbai
April 20	DC vs MI	7:30 pm	Chennai
April 21	PK vs SRH	3:30 pm	Chennai
April 21	KKR vs CSK	7:30 pm	Mumbai
April 22	RCB vs RR	7:30 pm	Mumbai
April 23	PK vs MI	7:30 pm	Chennai
April 24	RR vs KKR	7:30 pm	Mumbai
April 25	CSK vs RCB	3:30 pm	Mumbai
April 25	SRH vs DC	7:30 pm	Chennai
April 26	PK vs KKR	7:30 pm	Ahmedabad
April 27	DC vs RCB	7:30 pm	Ahmedabad
April 28	CSK vs SRH	7:30 pm	Delhi
April 29	MI vs RR	3:30 pm	Delhi
April 29	DC vs KKR	7:30 pm	Ahmedabad
April 30	PK vs RCB	7:30 pm	Ahmedabad
May 1	MI vs CSK	7:30 pm	Delhi
May 2	RR vs SRH	3:30 pm	Delhi
May 2	PK vs DC	7:30 pm	Ahmedabad
May 3	KKR vs RCB	7:30 pm	Ahmedabad
May 4	SRH vs MI	7:30 pm	Delhi
May 5	RR vs CSK	7:30 pm	Delhi
May 6	RCB vs PK	7:30 pm	Ahmedabad
May 7	SRH vs CSK	7:30 pm	Delhi
May 8	KKR vs DC	3:30 pm	Ahmedabad
May 8	RR vs MI	7:30 pm	Delhi
May 9	CSK vs PK	3:30 pm	Bengaluru
May 9	RCB vs SRH	7:30 pm	Kolkata
May 10	MI vs KKR	7:30 pm	Bengaluru
May 11	DC vs RR	7:30 pm	Kolkata
May 12	CSK vs KKR	7:30 pm	Bengaluru
May 13	MI vs PK	3:30 pm	Bengaluru
May 13	SRH vs RR	7:30 pm	Kolkata
May 14	RCB vs DC	7:30 pm	Kolkata
May 15	KKR vs PK	7:30 pm	Bengaluru
May 16	RR vs RCB	3:30 pm	Kolkata
May 16	CSK vs MI	7:30 pm	Bengaluru
May 17	DC vs SRH	7:30 pm	Kolkata
May 18	KKR vs RR	7:30 pm	Bengaluru
May 19	SRH vs PK	7:30 pm	Bengaluru
May 20	RCB vs MI	7:30 pm	Kolkata
May 21	KKR vs SRH	3:30 pm	Bengaluru
May 21	DC vs CSK	7:30 pm	Kolkata
May 22	PK vs RR	7:30 pm	Bengaluru
May 23	MI vs DC	3:30 pm	Kolkata
May 23	RCB vs CSK	7:30 pm	Kolkata
May 25	Qualifier 1	7:30 pm	Ahmedabad
May 26	Eliminator	7:30 pm	Ahmedabad
May 28	Qualifier 2	7:30 pm	Ahmedabad
May 30	Final	7:30 pm	Ahmedabad

New Zealand Test squad nung Devon Conway denogo



Test Championship final asayatsü aliba tejakdang squad nung züngsem 15 tashi ajemtsüsü, ta New Zealand Cricket-i ashi.

2017 kum New Zealand nung Conway dener külen nungi, international cricket tsütsü pai run jenti yangluogo. Taoba ita Wellington nung New Zealand aser Bangladesh asayaba mapang, Conway-i mezüng one-day international century yanglua liasü.

Wellington, Rongchii/April 08, 2021 (Agencies): Aruya aliba England tour atema New Zealand indang Test squad züngsem 20 nung maden alir asayar asem rongnung Brehostibarnü South Africa nung soa intetsang batsman, Devon Conway anisemogo.

Conway, shiba taoba kum August ita Black Caps atema asayatsü melaa liasü, June ita Lord's aser Edgbaston nung asayatsü aliba Test atema all-rounder Rachin Ravindra aser swing bowler Jacob Duffy na den squad nung denogo.

Ano June ita Southampton kübok Rose Bowl nung World

Maneni, aruya aliba England Tour atema New Zealand Squad rongnung Kane Williamson (captain), Tom Blundell, Trent Boult, Doug Bracewell, Devon Conway, Colin de Grandhomme, Jacob Duffy, Matt Henry, Kyle Jamieson, Tom Latham, Daryl Mitchell, Henry Nicholls, Ajaz Patel, Rachin Ravindra, Mitchell Santner, Tim Southee, Ross Taylor, Neil Wagner, BJ Watling aser Will Young nung dena lir.

BILEMDANGANG

"Pei ajangzük nudang takum bendanga agüjadoker alir."